



Na osnovu odredbe člana 20. Zakona o dopunskim pravima branitelja/branilaca i članova njihovih obitelji/porodica-treći prečišćeni tekst ("Službene novine Tuzlanskog kantona", broj: 8/26), odredbe člana 17. Odluke o utvrđivanju uslova, ograničenja, kriterija i postupka dodjele stipendija braniocima Bosne i Hercegovine i djeci branilaca ("Službene novine Tuzlanskog kantona", broj: 5/24, 5/26 i broj: 02/1-04-005539/26 od 14.07.2026. godine) i Odluke o raspisivanju ponovljenih javnih konkursa i utvrđivanje teksta javnih konkursa za dodjelu stipendija braniocima Bosne i Hercegovine i djeci branilaca u 2026. godini, broj: D-15/1-04-005539/26 od 14.07.2026. godine, Ministarstvo za boračka pitanja Tuzlanskog kantona objavljuje:

PONOVLJENI JAVNI KONKURS **za dodjelu stipendija redovnim/samofinansirajućim studentima dodiplomskog** **studija iz reda branilačke populacije Tuzlanskog kantona za studij u akademskoj** **2025/2026. godini**

I Lica koja mogu podnijeti prijavu

(1) U skladu sa odredbom člana 6. Odluke o utvrđivanju uslova, ograničenja, kriterija i postupka dodjele stipendija braniocima Bosne i Hercegovine i djeci branilaca ("Službene novine Tuzlanskog kantona", broj: 5/24, 5/26 i broj: 02/1-04-005539/26 od 14.07.2026. godine - u daljem tekstu: Odluka), pravo na podnošenje prijave po ovom Konkursu imaju lica iz člana 20. stav (1) Zakona o dopunskim pravima branitelja/branilaca i članova njihovih obitelji/porodica – treći prečišćeni tekst ("Službene novine Tuzlanskog kantona", broj: 8/26) – u daljem tekstu: Zakon) koja obrazovanje stiču u javnoj visokoškolskoj ustanovi u Bosni Hercegovini, ukoliko imaju status redovnog/samofinansirajućeg studenta, kako slijedi:

- a) dijete poginulog, umrlog i nestalog branioca,
- b) ratni vojni invalid kojem je to svojstvo utvrđeno rješenjem nadležnog organa, izdatog u skladu sa važećim federalnim propisima iz oblasti boračko-invalidske zaštite,
- c) dobitnik ratnog priznanja i odlikovanja koji je korisnik prava na mjesečni novčani dodatak, na osnovu konačnog rješenja nadležnog organa, u skladu sa odredbama Zakona o posebnim pravima dobitnika ratnih priznanja i odlikovanja i članova njihovih porodica,
- d) demobilisani branilac koji je učestvovao u pripremama za odbranu ili u odbrani Bosne i Hercegovine, od 18.09.1991. do 22.04.1996. godine, najmanje 12 mjeseci, pod uslovom da ne postoje okolnosti iz člana 36. Zakona o pravima branilaca i članova njihovih porodica („Službene novine Federacije Bosne i Hercegovine“, br. 33/04, 56/05 - ispr., 44/05 - odluka US, 70/07, 9/10, 95/13 - odluka US, 90/17, 29/22, 60/24 i 6/26 - u daljem tekstu: Federalni zakon),
- e) dijete ratnog vojnog invalida dok je na redovnom studiranju,
- f) dijete dobitnika ratnog priznanja i odlikovanja dok je na redovnom studiranju i
- g) dijete demobilisanog branioca dok je na redovnom studiranju.

(2) Izuzetno, lice iz člana 20. stav (1) Zakona i nakon navršenih 25 godina života, a najkasnije do 27. godine života, ima pravo na podnošenje prijave za dodjelu stipendija tokom redovnog studiranja ukoliko je upisalo integrisani studij prvog i drugog ciklusa studija koji traje najmanje pet godina i čijim završetkom se stiče najmanje 300 ECTS bodova.

II Uslovi za podnošenje prijave

(1) Na Konkurs se može prijaviti lice koje ispunjava uslove utvrđene odredbom člana 7. Odluke, kako slijedi:



a) ima prijavljeno mjesto prebivališta na području Kantona, osim za povratnike u Republiku Srpsku (u daljem tekstu: RS),

b) prava iz oblasti boračko-invalidske zaštite ostvaruje na području Kantona,

c) je u tekućoj studijskoj godini prvi put upisao određenu godinu studija i

d) je redovni/samofinancirajući student javne visokoškolske ustanove u Bosni i Hercegovini prvog ciklusa dodiplomskog studija koja ima status javne ustanove u Bosni Hercegovini.

(2) Studij na visokoškolskoj ustanovi, obuhvata redovni i samofinansirajući studij prvog ciklusa Bolonjskog sistema studiranja koji se vrednuje sa 180 ECTS bodova, odnosno 240 ECTS bodova.

(3) Izuzetno studij na visokoškolskoj ustanovi obuhvata i integrisani studij prvog i drugog ciklusa studija koji traje najmanje pet godina i čijim završetkom se stiče najmanje 300 ECTS bodova (npr. studij medicine, farmacije, stomatologije i sl.).

III Ograničenje prava na podnošenje prijave

Shodno odredbi člana 8. Odluke, pravo na podnošenje prijave po ovom Konkursu **nema** lice koje:

a) studira na visokoškolskoj ustanovi u inostranstvu,

b) ima status studenta – apsolventa,

c) studira na privatnom fakultetu,

d) ima dug po osnovu javnih prihoda, odnosno čiji roditelji/roditelj/staratelj/staratelj/bračni drug imaju dug po osnovu javnih prihoda, osim ako isti imaju prebivalište na području Republike Srpske,

e) je u tekućoj akademskoj godini, na istom ili drugom fakultetu, ponovo upisalo istu godinu studija,

f) već prima kredit/stipendiju od nekog drugog organa, institucije ili fondacije,

g) je na vanrednom studiju,

h) živi u porodičnom domaćinstvu gdje se ostvaruju mjesečna novčana primanja po članu domaćinstva veća od 50,01% prosječne neto plaće ostvarene u Federaciji BiH u prethodnoj godini prema podacima Zavoda za statistiku Federacije BiH, osim lica iz tačke V stav (1) tačke a), b) i c) ovog Konkursa.

IV Kriteriji za bodovanje

Rang lista se shodno odredbi člana 9. Odluke utvrđuje na osnovu ostvarenog broja bodova utvrđenog po osnovu sljedećih kriterija:

a) ostvarenog uspjeha u prethodno završenoj studijskoj/akademskoj godini,

b) imovinskog cenzusa,

c) boračkog statusa,

d) ratnih priznanja i odlikovanja i

f) osvojenih nagrada i plaketa.

V Izbor lica bez bodovanja

(1) Prema odredbi člana 10. Odluke, izuzetno od tačke IV ovog Konkursa, pod uslovom da ima uredno propisanu dokumentaciju, pravo na dodjelu stipendije bez bodovanja ima:

a) lice u statusu ratnog vojnog invalida,

b) lice u statusu dobitnika ratnog priznanja i odlikovanja,

c) lice u statusu demobilisanog branioca,

d) lice sa prosjekom ocjena iznad 9.00 u toku studiranja i lice sa prosjekom ocjena 5.00 u toku školovanja, pod uslovom da se na isto ne odnosi propisano ograničenje iz člana 8. stav h) Odluke, odnosno pod uslovom da članovi porodičnog domaćinstva sa kojima lice živi ne ostvaruju mjesečna novčana primanja po članu domaćinstva veća od 50,1% prosječne neto plaće ostvarene u Federaciji u prethodnoj godini prema podacima Zavoda za statistiku Federacije Bosne i Hercegovine.

(2) Pod prosjekom ocjena iz stava (1) tačka d) i e) ove tačke podrazumijeva se ukupan prosjek ocjena lica u toku studiranja, a u slučaju upisa prve godine fakulteta, prosjek ocjena iz prethodne četiri godine redovnog školovanja.

VI Prioritet pri jednakom broju bodova

Ukoliko na listi dva ili više lica, imaju isti ukupan broj bodova, izuzev lica iz tačke V ovog Konkursa, prednost po navedenom redoslijedu ima:

- a) lice u statusu studenta koje je dijete poginulog, umrlog ili nestalog branioca,
- b) lice u statusu studenta koje je dijete ratnog vojnog invalida sa većim procentom invaliditeta,
- c) lice u statusu studenta koje je dijete dobitnika većeg ratnog priznanja i odlikovanja,
- d) lice u statusu studenta koje je dijete demobilisanog branioca sa dužim stažom učešća roditelja u Oružanim snagama,
- e) lice u statusu studenta sa većim prosjekom ocjena i
- f) lice u statusu studenta lošijeg materijalnog položaja.



VII Prava i obaveze lica i način isplate sredstava

(1) Lice koje ostvari pravo na stipendiju, obavezno je sa Ministarstvom zaključiti Ugovor o stipendiranju, u roku od 30 dana od dana isticanja Konačne liste na internet stranici Vlade Tuzlanskog kantona.

(2) Lice koje ostvari pravo na stipendiju, a koje u roku iz stava (1) ove tačke ne potpiše ugovor, smatrat će se da je odustalo od stipendije, izuzev u slučaju ukoliko u roku od najdalje 60 dana od dana isticanja Konačne rang liste dokaže na osnovu pismenih dokaza da iz opravdanih razloga nije bilo u mogućnosti pristupiti potpisivanju ugovora.

(3) Stipendije su nepovratne pod uslovnom da lice kao potpisnik ugovora redovno ispunjava svoje ugovorene obaveze.

(4) Ugovor iz stava (1) ove tačke sadrži ukupan iznos odobrene stipendije, način isplate stipendije, odredbe o gubitku prava na stipendiju, obavezu vraćanja iznosa primljene stipendije i nadležnost suda kod eventualno nastalih sporova.

(5) Stipendija se isplaćuje u devet rata, ovisno od priliva sredstava u Budžet Kantona putem računa otvorenog kod banke lica koje je ostvarilo prvo na stipendiju, u skladu sa ugovorom o stipendiranju.

VIII Gubitak prava na stipendiju i povrat stipendije

(1) Lice koje je steklo pravo stipendiju, gubi pravo na dalju isplatu stipendije, ako u toku studijske godine:

- a) bude upućen na izdržavanje kazne zatvora u trajanju dužem od tri mjeseca,
- b) mu bude izrečena disciplinska mjera isključenja sa univerziteta,
- c) redovno ne upiše semestar, što se dokazuje uvjerenjem,
- d) po nekom drugom osnovu prestane mu status redovnog studenta,
- e) počne da prima stipendiju od drugog davaoca stipendije, od dana početka primanja te stipendije i
- f) naknadno se utvrdi da su prilikom prijave na konkurs od strane lica iznesene netačne činjenice (materijalno stanje lica i članova porodice, izjava da ne prima stipendiju iz drugog izvora, i dr).

(2) Lice koje je steklo pravo na stipendiju, dužno je prijaviti svaku nastalu promjenu iz stava (1) ove tačke u roku od 15 dana od dana nastanka promjene.

(3) U slučajevima iz stava (1) ove tačke, potpisnik ugovora je dužan vratiti sav iznos primljenih sredstava, osim u slučajevima gubitka prava na dalju isplatu stipendije iz razloga propisanih u stavu (1) tačkama c) i d) ove tačke, koji su nastali zbog više sile koja je dovela do onemogućavanja ili ometanja izvršenja obaveza iz ugovora.

(4) Viša sila podrazumijeva ekstremne i vanredne događaje koji se nisu mogli predvidjeti, izbjeći i otkloniti i koji su se dogodili bez volje i uticaja strana u ugovoru.

(5) Višom silom mogu se smatrati poplave, zemljotresi, požari, politička zbivanja (rat, neredi većeg obima, štrajkovi, nesposobnost, teška bolest, invalidnost).

(6) U svim slučajevima gdje lice dobrovoljno ne izvrši povrat isplaćenih stipendija zbog nastupanja okolnosti iz stava (1) ove tačke, Ministarstvo je obavezno pokrenuti postupak pred nadležnim sudom u cilju povrata stipendija uz pripadajuću zakonsku kamatu.

IX Potrebna dokumentacija

Lice čija je prijava po ranije okončanom javnom konkursu za dodjelu stipendije redovnom/samofinansirajućem studentu dodiplomskog studija za studij u akademskoj 2025/2026. godinu bila neblagovremena ili nekompletna ili neosnovana dostavlja prijavu na ponovljeni javni konkurs za dodjelu stipendije (Anex VII) i nedostajuću dokumentaciju evidentiranu na Listi lica u statusu studenta za dodjelu stipendija za akademsku 2025/2026 godinu, čije su prijave odbačene kao nekompletne, neblagovremene ili odbijene kao neosnovane, broj: 15/1-11-016734/26 od 22.05.2026. godine.

Lice koje nije učestvovalo u proceduri po ranije okončanom Javnom konkursu za dodjelu stipendije redovnom/samofinansirajućem studentu dodiplomskog studija iz reda branilačke populacije Tuzlanskog kantona za studij u akademskoj 2025/2026. godinu uz prijavu na ponovljeni javni konkurs za dodjelu stipendije (Anex VII) prilaže dokumentaciju iz Anexa II i izjavu iz Anexa III koja ne može biti starija od 30 dana od dana objave ponovljenog javnog konkursa, izuzev dokumentacije iz tačke 3. navedenoj u Aneksu II.

Uvažavajući odredbu člana 18a. Odluke, obzirom da lice prilikom prijave na ponovljeni javni konkurs za dodjelu stipendije dostavlja prijavu na propisanom obrascu Anex VII, nije neophodno uporedo dostavljati i prijavu na Aneksu I navedenu u popisu potrebne dokumentacije.

Anex II.

Popis potrebne dokumentacije uz prijavu za dodjelu stipendije podnosiocu prijave u statusu redovnog/samofinansirajućeg studenta

Redni broj:	Naziv dokumenta	Organ koji ga izdaje dokument
1.	Prijava za učešće na konkursu - <i>Anex I. (original)</i>	Ministarstvo za boračka pitanja Tuzlanskog kantona
2.	Kućna lista u kojoj su navedeni svi članovi porodičnog domaćinstva, <i>(original ili ovjerena fotokopija),</i> Napomena: <i>Ukoliko lice nema navedena oba roditelja na listi dostaviti odgovarajući dokaz o istom: (presudu o razvodu braka, izvod iz matične knjige rođenih ili umrlih ili vjenčanih- ako je lice podnosilac prijave stupilo u bračnu zajednicu)</i>	Nadležna gradska/općinska služba
3.	Dokaz o pripadnosti boračkoj populaciji: a) za korisnika prava u statusu, djeteta poginulog, umrlog i nestalog branioca 1. posljednje rješenje o priznatom pravu na porodičnu invalidninu u kojem je navedeno lice kao korisnik prava b) za korisnika prava u statusu ratnog vojnog invalida, 1. posljednje rješenje na snazi o priznatom svojstvu ratnog vojnog invalida c) za korisnika prava u u statusu demobilisanog branioca: 1. uvjerenje o dužini učešća u OS BiH. d) za korisnika prava u statusu dobitnika ratnog priznanja i odlikovanja oba dokumenta kumulativno:	Gradska/općinska služba nadležna za boračko invalidsku zaštitu (tč.a) Gradska/općinska služba nadležna za boračko invalidsku zaštitu (tč.b) Grupa za pitanja iz oblasti vojne evidencije (tč.c) Gradska/općinska služba nadležna za boračko invalidsku zaštitu (tč.d)

	1. posljednje rješenje na snazi i u zavisnosti od pripadnosti boračkoj kategoriji (porodice šehida, poginulih nestalih branilaca ili ratni vojni invalid ili demobilisani branilac) jedan od dokumenata iz tački a) i/ili b) i/ili c) e) lica u statusu djeteta nosioca prava, uz jedan od dokumenata iz tački a) ili b) ili c) ili d) dostavlja i: 1. izvod iz matične knjige rođenih podnosioca prijave, kao dokaz o srodstvu sa nosiocem prava <i>(original ili ovjerena fotokopija)</i>	Gradska/općinska služba nadležna za boračko invalidsku zaštitu (tč. a,b, d) Grupa za pitanja iz oblasti vojne evidencije (tč.c) Gradska/općinska služba opću upravu i zajedničke poslove (tč. 1.) 
4.	Dokazi o zaposlenju i visini stalnih izvora prihoda za sve punoljetne članove porodičnog domaćinstva navedene u kućnoj listi a) platna lista neposredno prije objave konkursa ili uvjerenje poslodavca o poslednje isplaćenju plaći i visini posljednje mjesečne plaće ili b) original poslednji ček od PIO penzije neposredno prije objave konkursa ili fotokopija istog ili c) obrazac JS 3650 za lica koja imaju registrovanu samostalnu djelatnost <i>(original ili ovjerena fotokopija)</i>	Porezna uprava FBiH Ispostave Porezne uprave ili Poslodavac kod kojeg je zaposlenje ili PIO/MIO ili Nadležna općinska/gradska služba
5.	a) uvjerenje službe za zapošljavanje za sve nezaposlene članove domaćinstva navedene u kućnoj listi <i>a ukoliko se isti ne vode na evidenciji službe za zapošljavanje, za sve nezaposlene članove domaćinstva dostaviti</i> b) uvjerenje iz ispostave porezne uprave da se lice ne vodi u jedinstvenom sistemu registracije, kontrole i naplate doprinosa kao dokaz o statusu nezaposlenosti, <i>(original ili ovjerena fotokopija),</i>	Služba za za zapošljavanje ili Porezna uprava FBiH Ispostave porezne uprave
6.	uvjerenje o postojanju/nepostojanju duga po osnovu javnih prihoda za lica kao podnosioca zahtjeva i sva lica navedena u kućnoj listi, izuzev za lica koja imaju prebivalište u Republici Srpskoj <i>(original ili ovjerena fotokopija)</i>	Porezna uprava FBiH Ispostave porezne uprave
7.	Uvjerenje o redovnom studiranju <i>(original ili ovjerena fotokopija)</i>	Ustanove visokog/srednjeg obrazovanja
8.	Uvjerenje o redovnom školovanju/studiranju za sve članove porodičnog domaćinstva, navedene na kućnoj listi, koji se nalaze na redovnom školovanju <i>(original ili ovjerena fotokopija)</i>	Ustanove visokog/srednjeg obrazovanja
9.	Uvjerenje sa utvrđenim prosjekom ocjena u prethodno završenoj studijskoj godini, a u slučaju upisa prve godine fakulteta prosjek ocjena iz prethodne četiri godine redovnog školovanja ili svjedočanstva o završenim razredima <i>(original ili ovjerena fotokopija)</i>	Ustanove visokog/srednjeg obrazovanja
10.	Dokaz o osvojenim nagradama i priznanjima u školskim i nastavnim aktivnostima iz prethodne školske/studijske godine: srebrene/bronzane plakete; diplome o proglašenju učenika generacije; osvojene nagrade i priznanja na međunarodnom /državnom/federalnom/kantonalnom takmičenju) <i>(original ili ovjerena fotokopija)</i>	Obrazovne ustanove
11.	Izjava podnosioca prijave - Anex III	Nadležna gradska/općinska služba ili notar
12.	Broj žiro računa podnosioca prijave - studenta	Poslovna banka

	Kopija žiro računa se dostavlja uz prijavu ili nakon isticanja konačne rang liste.	
13.	Fotokopija lične karte podnosioca prijave	Ministarstvo unutrašnjih poslova Tuzlanskog kantona



NAPOMENA:

Udove koje koriste pravo na porodičnu PIO/MIO penziju, pored čeka PIO/MIO OBAVEZNO su dostaviti i dokaz o radno pravnom statusu-kumulativno (tačke 4. i 5. Popisa potrebne dokumentacije – Anex II).

Dokumentacija iz Anexa II ne može biti starija od 30 dana od dana objave Konkursa, izuzev dokumentacije iz tačke 3. navedene u Anexu II.

X Rokovi za podnošenje zahtjeva

(1) Rok za podnošenje prijava po ovom Konkursu je 8 dana od dana objavljivanja na internet-stranici Ministarstva odnosno Vlade Kantona, od **15.07.2026. - 23.07.2026. godine (četvrtak).**

(2) Činjenice iz prijava se uzimaju u razmatranje onakve kakve su bile na dan zaključivanja konkursa. Prijava i dokumentacija dostavljena nakon isteka roka za podnošenje prijava, Komisija ne uzima u razmatranje u postupku po prijavi ni u postupku po prigovoru.

(3) **Popunjena i potpisana** jednoobrazna prijava na Konkurs sa potrebnom dokumentacijom, podnosi se u zatvorenoj koverti, najkasnije u roku od 8 dana od dana objavljivanja Konkursa, na pisarnicu Ureda za zajedničke poslove kantonalnih organa uprave ili preporučeno putem pošte na adresu Ureda za zajedničke poslove kantonalnih organa uprave, ul. Fra Grge Martića broj 8, 75000 Tuzla

[sa naznakom]

Ministarstvo za boračka pitanja Tuzlanskog kantona,

“Prijava na ponovljeni javni konkurs za dodjelu stipendije redovnom/samofinansirajućem studentu dodiplomskog studija iz reda branilačke populacije Tuzlanskog kantona za studij u akademskoj 2025/2026. godini“

(4) Tekst Konkursa, Obrazac prijave (Anex VII), popis potrebne dokumentacije (Anex II) i obrazac izjave (Anex III) zainteresovano lice može preuzeti:

- sa web - stranice Vlade Tuzlanskog kantona,
- u gradskoj/općinskoj službi nadležnoj za poslove boračko-invalidske zaštite i
- u kantonalnim boračkim savezima i udruženjima.

NAPOMENA:

Neblagovremene prijave ne mogu se uzeti u razmatranje.

O nepotpunim, neblagovremenim i neosnovanim prijavama, lica se obavještavaju isticanjem zasebnih listi.

Komisija zadržava pravo poništenja Konkursa u bilo kojoj fazi konkursne procedure.

**MINISTARSTVO ZA BORAČKA PITANJA
TUZLANSKOG KANTONA**